

四庫全書

史部

欽定四庫全書

史部

張襄壯奏疏卷四

詳校官國子監司業臣納履實

編修臣表謙覆勘

總校官編修臣倉聖脉

校對官中書臣李 禟

謄錄監生臣郭洽怡

欽定四庫全書

張襄壯奏疏卷四

甘肅提督靖逆侯張勇撰

靖逆侯靖逆將軍兼管甘肅提督事務臣張勇謹密題為舉首逆書事竊照逆賊大犯西和臣正在計畫勦禦間於康熙十四年十一月二十一日有二人到臣軍前鬚髮盡白見臣惟有哭泣因投書一封說係叛賊吳將軍著來鞏昌投遞臣問你係何人年齒已老為何

前來投送逆書據供小的一係貢生一係百姓俱有家眷三四十口頗饒產業塞被叛賊吳將軍將小的弁家口拿去與書一封著來投遞如若不來就要把小的殺了并處治各家口無奈冒死前來投獻等情據此臣隨拆閱來書俱係亂言反間竊臣素秉愚忠一心為國恨不亟殲窮兇用昭

天討以快人心何物叛逆勒害良民敢以狂言煽惑微臣真不禁髮指除將二人扭鎖監禁將逆書咨送兵部

外相應題

報候

旨發落伏乞

皇上睿覽勅部議覆施行康熙十四年十一月二十二

日題奉

旨覽卿奏逆賊差人投書卿即行舉首將來人拿禁具
見矢志忠貞可嘉著議叙具奏餘著議奏兵部知道欽
此除逆書焚燬外查靖逆將軍侯張勇出首逆書相應

議叙張勇係左都督太子太保奉

特旨授為靖逆侯今無級可加應准紀功一次至授送
逆書二人該將軍既稱係逆賊勒害良民無奈前來投
遞等語應聽該將軍酌量發落可也奉

旨依議

靖逆侯靖逆將軍兼管甘肅提督事務臣張勇謹

題為

請補營將以資征勦事准寧夏鎮今陞提督臣陳福移

咨到臣該臣查得中衛副將賈從哲業經正法鎮標右營遊擊柯彩已經

題補定邊副將所遺員缺值茲地方多事之際萬難久懸今准提臣以原任花馬池副將賴塔屢立戰功人地相宜擬補中衛營副將以隨征原任京口鎮標左營遊擊劉伯玉立功八次並援

俞旨請還原職補用右營遊擊等因查賴塔經臣前咨督臣哈占擬補慶陽副將後准督臣咨移俟慶陽招撫

另行

題補在案此缺尚懸但中衛副將并鎮標遊擊二缺俱
係緊要不便乏人今查賴塔劉伯玉才能較衆歷著戰
功以之補用前缺似為允當者也臣謹會同督臣哈占
甘寧撫臣華善合詞具

題伏乞

皇上睿鑒勅部議覆施行康熙十四年十一月二十五

日題奉

旨兵部知道欽此查該將軍侯正在征勦用人之際均應如其所

題所有伊等功次俟議叙之日扣除可也奉

旨依議

靖逆侯靖逆將軍兼管甘肅提督事務臣張勇謹

題為稟報陣亡官員事康熙十四年十二月十四日據防守張義堡領旗郭恩王居位報稱千總范洪勳奉遣領兵一百名防守張義堡於本月初十日未時忽來賊

兵馬步數百名竟赴堡搶掠人民千總范洪勳率所部
目兵暗出城門奮力當先從中截殺不意身帶重傷不
能對敵說爾等可奮力撲殺勿以我為念恐致失機不
便小的等遂一鼓前進將賊殺退追趕十餘里于酉時
收兵陣斬賊二十七名我兵帶傷九名而范千總已經
絕氣看所傷之處前胸左中鉛右臂中箭理合具報等
情據此除臣一面另委官員前去固守城池外查得張
義堡離固原八十餘里為靜寧州要地因固原逆賊鴉

張臣遣發標下左營千總范洪勳帶領馬兵一百名防守堵禦不意逆賊來犯范洪勳奮不顧身當先堵殺以致重傷陣亡殊為可憫除所遺員缺遴選咨部補用外緣係營弁殺賊陣亡相應援

請廩卹以慰忠魂以鼓後効者也臣謹會同甘寧撫臣華善合詞具題伏乞

皇上睿鑒勅部議覆施行康熙十四年十二月二十一日題奉

旨據奏千總范洪勳奮勇殺賊陣亡可憫作何恩卹著
議奏該部知道欽此查定例內陣亡武職官員四品職
任以下者准廩子弟一人以衛千總推用給卹銀一百
五十兩等語陣亡千總范洪勳應准廩子弟一人以衛
千總推用仍照例給與卹銀可也奉

旨依議

靖逆侯靖逆將軍兼管甘肅提督事務臣張勇謹

題為飛報勦撫逆賊事康熙十四年十二月二十五日

據撫標左營遊擊岳鎮邦塘報內稱竊照卑職因逆賊
在于水落城侵犯靜寧地方民被屠害業經呈報隨蒙
飭令卑職率兵進剿卑職遵奉同爵標千總羅天壽等
領兵千餘前進及抵賊境而逆賊統馬步賊兵二千餘
前來迎敵卑職將兵分為二陣各率領從左右兩路奮
力鏖戰賊遂披靡敗遁被我官兵陣斬偽副將一員守
千把官八員殺死賊兵五百餘名活捉賊兵一百一十
五名餘賊四散內有偽副將雒世仲偽遊擊李必捷等

自知已無生路隨帶領見在賊兵二百四十三名投誠
併被賊所掠民人婦女一百二十三名口俱查明釋放
訖奪獲盔甲馬匹弓箭腰刀火器等項無數在事有功
人員俟查明另報等情到臣據此該臣看得靜寧所屬
之水落城離固原一百二十五里離平涼二百餘里此
兩處逆賊利靜寧為通渭莊浪各州縣糧道故每遣賊
兵欲行襲取搬運糧料以濟兵食臣等業已遣發遊擊
岳鎮邦帶兵千餘固守猶恐兵力單薄又調臨洮遊擊

謝世忠河營守備林時泰率兵前赴協防續據岳鎮邦
稟報逆賊鴟張臣等隨飭該遊擊率同千總羅天壽等
督兵進剿留遊擊謝世忠等防守城池乃岳鎮邦等果
能奮力効謀勦撫逆賊奪獲器械查釋難民厥功誠
為懋著者也茲據塘報前來理合題

報伏乞

皇上睿鑒勅部議覆施行康熙十四年十二月二十八

日題奉

旨據奏岳鎮邦等奮力効謀勦撫逆賊可嘉事平之日
議叙具奏兵部知道

靖逆侯靖逆將軍兼管甘肅提督事務臣張勇謹

題為欽奉

上諭事准兵部咨開康熙十五年正月初四日奉

上諭前將軍侯張勇具題請將天津總兵官趙良棟發
往陝西彼時因陝西事體尚緩天津當海口要地故未
發去今寧夏有事趙良棟陝西如有用處將軍張勇或

調去應用或不必調往陝西之處令其作速密行具奏
欽此備咨到臣同日又准兵部咨為兵丁鼓噪事內開
寧夏係三邊要地關係重大應請

勅下靖逆將軍侯張勇巡撫華善遴選忠貞賢能之員
補授寧夏總兵官令其速赴安撫官兵之心綏定地方
仍令將軍巡撫公同商議如輩昌等處無有妨礙可以
分往將軍巡撫二人內擬一人前往寧夏安撫官兵再
回若將軍巡撫斷不可離輩則不必去將寧夏情形打

探的確不時題報其西寧總兵官王進寶已補提督所
遺員缺或應推補或令王進寶以提督兼管西寧總兵
官事聽將軍張勇巡撫華善酌議具題等因到臣竊照
寧夏地當衝邊為秦省要區今值變故臣聞報之日慮
官兵無有統紀民心驚惶又恐逆賊王輔臣遣發賊兵
侵擾再布訛言則地方深為隱憂臣擬率兵赴彼撫綏
軍民俟拉員外郎大兵抵固原仍回鞏昌今奉
旨擬臣與撫臣分任臣愚以為必須臣親前往庶為

安妥除臣移會將軍佛尼勒甘撫臣華善西寧鎮臣王進寶令其嚴加防範固守秦州外臣擬于正月十二日統兵起行赴寧但寧鎮官兵見無總統急須賢能之員彈壓地方今奉

旨令臣同撫臣遴選忠貞賢能之員速赴寧鎮又奉上諭趙良棟陝西如有用處將軍張勇或調去應用查天津總兵趙良棟向隨臣征勦所至歷有功績區畫每無遺策其韜鈴素裕迥有過人之才臣知最深故前

題請調補寧夏總兵官今寧夏有事若得趙良棟控制甚為得人倘蒙

俞允調補乞

勅令由邊路兼程速赴任事俟臣抵寧安撫後如鞏秦有事臣仍回鞏如鞏秦無事臣同鎮臣趙良棟相機進勦平固庶期妖氛立靖耳至于總兵官王進寶已陞提督所遺員缺暫停推補仍令暫管西寧總兵事俟事平再為推補可也臣謹會同甘撫臣華善合詞具

題伏乞

皇上睿鑒勅部議覆施行康熙十五年正月十二日題奉

旨將軍侯張勇為國籌畫周詳深為可嘉本內情節議政王貝勒大臣會同速議具奏欽此查平定陝西全省勦滅逆賊等項事宜一惟將軍侯張勇是賴今將軍侯張勇身在地方稔知賊寇情形地方緩急擬親赴寧夏撫綏軍民俟安撫料理後如鞏秦有事仍回鞏昌如鞏

秦無事臣同鎮臣趙良棟相機進勦平固移會將軍佛尼勒巡撫華善提督王進寶令其固守秦州等語均應如其所題聽將軍速赴寧夏撫綏軍民並將進取平固之處相機速行至于天津總兵官趙良棟駐鎮海口要地深得兵民之心不宜令離天津但寧夏有事將軍侯張勇復稱趙良棟韜鈴素裕迥有過人之才臣知最深請調補寧夏總兵官等語且寧夏係三邊要地所關甚為重大合宜重其職任應以此缺改為提督員缺將趙

良棟陞為寧夏提督令其速赴寧夏聽將軍總督節制
印信禮部速為鑄給

勅書內閣撰給其西寧總兵官員缺既稱暫停推補仍
令王進寶管理事平再行推補亦應如所題至提督陳
福自逆賊吳三桂反叛以來屢次勦殺逆賊建立功勳
固守地方頗有勤勞為

國忘家竭盡心力忠誠顯著今忽遭變身沒相應將伊
弟涿州叅將陳奇優陞天津總兵官以酬忠勤

命下之日内閣撰給

勅書可也奉

旨趙良棟陞補寧夏提督總兵官陳奇陞補天津總兵
官餘俱依議速行

靖逆侯靖逆將軍兼管甘肅提督事務臣張勇謹

題為欽奉

上諭事竊照寧鎮告變臣慮地方叵測一面移會將
軍臣佛尼勒鎮臣王進寶撤兵回秦固守秦州一面檄

撤臣標兵馬擬于正月十二日起程帶領赴寧安撫軍
民業經題

報外不意於十二日忽接定西大將軍多羅貝勒照會
內閣本年正月初六日平涼城內投出裸裸一名阿丕
供稱初四日晚間平涼城內逆賊出兵發往秦州問其
數目供稱不知多少合行移會預為防範等因到臣十
三日又准提臣王進寶移會內稱逆賊王屏藩領兵欲
從吳寨出犯臣思逆賊吳之茂見拒守西和離秦僅二

百里王屏藩離秦亦不過二百餘里秦州兵力單薄倘
臣一離斯地賊兵乘虛入犯深為可虞臣遂移會將軍
佛尼勒提臣王進寶公議均謂臣萬不可輕離秦輩臣
思寧夏要地必須大臣前去遂議令提臣王進寶量帶
精兵三千名前赴寧夏彈壓地方遂統寧鎮官兵會合
副都統大兵相機進勦平固逆賊臣與將軍佛尼勒固
守秦州但提臣一去而將軍佛尼勒滿兵無幾臣標見
兵亦復寥寥況鞏昌兵馬又少不無乘機竊發之慮伏乞

勅下定西大將軍將甘肅鎮臣孫思克并所轄標兵撤回駐守鞏昌又臣發往平涼標兵撤回秦州再撥滿洲甲兵千餘發秦州將軍統領庶能四應馳勦地方可保無虞矣再照提臣王進寶如赴寧夏而寧夏鎮務即令兼管似為安便但西寧鎮缺亟須能員料理俟臣同撫臣華善公選賢能另疏請補外伏乞

皇上睿鑒勅部議覆施行康熙十五年正月十六日題

奉

旨議政王大臣會同速議具奏欽此查將軍侯張勇既稱四川逆賊吳之茂等欲犯秦州又平涼城內逆賊發往秦州臣萬不可輕離秦鞏等語相應將提督王進寶不必發往寧夏令將軍侯張勇等合力固守秦鞏等處地方堵勦逆賊提督王進寶既停其前往寧夏其所請選補西寧總兵官員缺之處無庸議仍照將軍侯張勇前題令提督王進寶兼管可也奉

旨依議速行

靖逆侯靖逆將軍兼管甘肅提督事務臣張勇謹
題為詳陳進勦逆賊機宜事竊照逆賊王輔臣負固平
涼日久難下者原因賊糧道未斷平涼兵少圍困不敷
又值寧夏有事恐賊愈為鴟張故臣前有赴寧夏之
請繼因秦州兵少臣不敢離秦又有留秦之

題今臣于本年正月十九日准兵部密咨一稟報事一緊
急軍情事該議政王等會覆大將軍貝勒并臣

題前事情由議得寧夏等處地方所關最要官兵作何

安撫地方百姓作何綏輯一惟靖逆將軍侯是賴至攻
取平涼在先尚俟提督陳福之兵今提督陳福身已如
此若不速取平涼則秦省底定無日應聽將軍侯張勇
等酌調官兵發去與大將軍貝勒等兵馬會合將併力
克取平涼之處一面作速舉行一面奏聞奉

旨移咨到臣但臣思各標兵馬除分防外見在單薄無
兵可撥臣與將軍臣佛尼勒提督臣王進寶公議應照

臣前

題臣赴寧夏會合招都統拉員外郎大兵相機夾勦平
固留將軍臣提臣保守秦鞏但臣離秦州而將軍提督
之兵又皆單薄伏乞

勒下將西安就近兵馬無論何處調發防守各隘將各
隘見在防守之兵撤回秦隴與將軍臣提臣之兵聯絡
分防庶秦鞏可保無虞矣今擬臣于正月二十日統兵
從秦州前赴寧夏所有撥防兵馬事宜伏乞

皇上睿鑒勒部議覆施行康熙十五年正月十九日題

奉

旨速議具奏欽此會議得將軍侯張勇目擊地方緩急
欲親赴寧夏會合大兵相機夾勦平固應如所題其速
赴寧夏將克取固原平涼等處及勦滅逆賊事宜酌量
而行仍將西安就近兵馬無論何處調撥照地方緩急
速行撤回固守地方堵勦逆賊可也奉

旨依議速行

靖逆侯靖逆將軍兼管甘肅提督事務臣張勇謹

題為遵

旨酌行調遣并報抵鞏日期事竊臣因寧夏兵變逆賊乘隙侵犯臣一面具

題一面于正月二十日自秦起程赴寧安撫行至鞏昌地方因見兵力單薄難資防禦隨留左營遊擊史孔筆帶標兵一千名駐鞏又前行至松山之龍灘河接准部丈會議奉

旨令臣駐劄適中地方四面調遣堵勦一惟聽臣酌行

等因臣遂將先遣去遊擊安守正赴寧之兵撤回莊浪後又據中衛同知張輔報賊找棧欲行渡河飛請援兵等情臣隨遣前營守備張士奇帶標兵五百名前去中衛防守但臣奉有駐劄適中之

旨因思蘭州路處四通可以居中調遣遂率兵回蘭乃屢據報川逆逼近秦鞏臣因營馬馳驅日久瘦損者多復于各營中挑選堪騎良馬一千匹令右營遊擊張文星前營遊擊安守正率標兵一千赴秦堵勦又將調來

各營兵丁一千名令嘉峪關遊擊劉大明山丹遊擊邊
永昌在蘭臨等處防守此臣節次酌行調遣之大畧也
計臣標兵除發平涼一千二百名留鞏一千名赴中衛
五百名赴秦州一千名以及留甘患病帶傷安塘外現
在隨臣兵馬僅有八百名乃係挑餘弱兵選剩疲馬悉
不堪用正在苦心籌畫間于二月二十五日復准部文
會議奉

旨著臣前赴鞏昌等因臣于本月三十日親赴鞏昌外

所有酌行調遣緣由並赴鞏昌日期理合一併題

報伏乞

皇上睿鑒勅部議覆施行康熙十五年二月二十九日

題奉

旨兵部知道

靖逆侯靖逆將軍兼管甘肅提督事務臣張勇謹

題為塘報殺敗逆賊事康熙十五年三月初十日據臣
標前營遊擊安守正撫標右營遊擊劉廷棟等塘報稱

本月初九日天明時候據南山架梁兵丁報稱有賊二千餘名出南山沙溝等情卑職等隨即上城瞭望果有逆賊二千餘俱帶紅盔纓將伏羌四門圍繞卑職等公議領兵從北東二門衝殺北門係參將呂天玉遊擊劉廷棟等領兵等領兵衝出東門係參將呂天玉遊擊劉廷棟等領兵衝出兩路勦殺逆賊大敗卑職隨即追勦至駱駝巷餘賊鳥散俱已遠遁卑職等至未時收兵查殺死賊兵無數活捉偽叅遊都守千把等二十餘名搜獲偽劄二十

餘張活捉逆賊一百餘名內有中傷者就於關子鎮正
法訖其餘六十餘名另行押解軍前所有奪獲馬匹盔
甲器械等項數目俟查明另報等情到臣據此該臣看
得自逆賊入犯秦鞏以來臣撤兵回蘭因賊勢日熾擬
即統師赴援奈箭瘡痛楚痰火暈迷肩輿所至日僅三
十里輾轉長途不能速援因思伏羌為秦鞏要路恐賊
襲取不可不預為之防業已先遣臣標前營遊擊安守
正山丹遊擊邊永昌協同撫標遊擊劉廷棟安遠叅將

呂天玉等各帶兵駐防保守城池以堵逆氛去後乃逆賊果乘夜前來掩取以斷我秦州糧道時遊擊安守正劉廷棟等隄備素密分布有方身先士卒合力擊勦擒斬偽官賊兵奪獲馬匹盔甲器械等項餘賊遠遁大獲全勝皆仰賴我

皇上天威遠播之所致也緣係殺敗逆賊理合具題伏乞

皇上睿鑒勅部議覆施行康熙十五年三月初十日題

奉

旨覽卿奏遣發遊擊安守正等於伏羌縣城外擊敗賊衆擒斬偽官賊兵甚多得獲馬匹器械等項具見調度有方將士奮勇可嘉在事有功人員事平之日議叙具奏兵部知道

靖逆侯靖逆將軍兼管甘肅提督事務臣張勇謹題為委員監造軍器并請移駐地方事康熙十五年三月二十五日准兵部密咨為就便製造盔甲軍器等事

會覆靖逆將軍侯張勇題前事等因奉

旨議政王貝勒大臣會同速議具奏欽此該臣等議得前因將軍侯張勇赴寧故四川逆賊齊犯關係甚為重大相應令將軍侯張勇暫回鞏昌整頓兵馬會同大將軍勦滅逆賊其盔甲器械乃係緊要軍需聽將軍侯張勇選委才能官員差赴蘭州速行製造以濟軍需等因移咨到臣該臣查得製造盔甲軍器等項乃征勦防禦之所必需臣先奉有駐劄適中要地

之

旨因蘭州路處四通可以暫為駐劄又因該地匠物甚便故于本年二月內有移駐就便製造之

請也但目今逆賊逼近秦鞏豈臣可逸坐蘭州製造軍器之時當即進兵于二月三十日離蘭三月初四日到鞏已經報明在案又于本月二十一日前抵伏羌因賊氣未靖極力分佈以備策應計兩旬之內肩輿代騎載道督兵靡有寧晷緣盛甲軍器等項關係軍需最急又

不敢視為可緩之事業已遵

旨委官赴蘭監造外但臣提督衙門原係新設遠在甘
州似難遙控萬一接應莫及不無貽悞封疆之慮或移
駐蘭州或議駐何地臣未敢擅便相應題

請伏乞

皇上睿鑒仍

勑部議覆施行康熙十五年三月二十七日題奉

旨議政王貝勒大臣會議具奏欽此查平定秦省征勦

逆賊悉皆付託將軍侯張勇今甘肅提督衙門或移于蘭州或駐何地聽將軍侯張勇酌量要地駐劄仍將駐劄處所報明該部可也奉

旨依議

靖逆侯靖逆將軍兼管甘肅提督事務臣張勇謹

密題為塘報殺敗逆賊事竊臣于康熙十五年三月二十七日據駐防寧遠縣撫標右營遊擊劉廷棟報稱馬塢偽汪總兵因將軍前往伏羌帶兵數千來犯寧遠查

寧遠為鞏昌要道兵力單薄請乞速發大兵前來保守
城池等情到臣臣隨遣臣標後營遊擊劉虎守備邵廷
臣并檄撫標右營遊擊劉廷棟同滿洲嘎喇昂邦纛章
京傑印領滿漢官兵三十名前往馬塢鎮迎勦去後今
于本年四月初一日據遊擊劉虎劉廷棟等塘報稱卑
職等奉令統領官兵同滿洲章京等帶領滿兵前赴馬
塢鎮會勦遵于二十八日至陳家窯劄營二十九日寅
時起營行至平頭山遇賊馬步千餘列隊迎敵卑職等

同滿洲章京督令官兵奮力撲勦逆賊敗遁下山卑職等分兵三路前進滿洲嘎喇昂邦章京等統領滿兵分為一路卑職虎帶領本標中營千把總韓成趙邦俊等分為一路撫標右營遊擊劉廷棟領守備邵廷臣千總治大年等各官兵分為一路一齊追趕至山下逆賊大敗奔逃馬撻鎮卑職等奮力追殺至城下賊兵擗命入堡我兵週圍攻勦連攻三陣砍去鹿角杆攻開賊寨二座殺死賊兵千餘得獲賊糧三百四十餘袋陣斬偽都

守等四員活捉逆賊四十三名其餘逆賊敗入老寨固
守不出奪獲馬匹旗幟盔甲鳥鎗片刀賞給有功人員
等情塘報到臣據此該臣看得馬鳩當伏羌之後又附
近鞏昌逆賊出犯寧遠無非欲邀我後故臣等會檄滿
漢官兵前去迎勦今據報稱分路夾勦奮力攻開賊寨
擒斬逆賊官兵一千四十餘員名得獲賊糧三百四十
餘袋陣獲盔甲馬匹等項俱賞有功人員等情前來是
皆仰賴我

皇上威福并諸將士同心用命之所致也臣謹會同將軍臣佛尼勒撫臣華善提臣王進寶合詞具

題伏乞

皇上睿鑒勅部議覆施行康熙十五年四月初四日題

奉

旨覽卿奏會同蘇章京傑印遣發滿漢官兵于馬塢等處地方擊敗賊衆擒斬甚多陣斬偽都司等得獲旗幟器械等項具見調度有方將士奮勇可嘉在事有功人

員著議叙具奏兵部知道

靖逆侯靖逆將軍兼管甘肅提督事務臣張勇謹題為舉首逆書事康熙十五年四月初三日據署西安州遊擊賀雙龍報到臣據此該臣看得賀雙龍以革職遊擊隨軍征勦渡河以來屢立戰功經臣題

請復職業蒙

俞允在案續臣以西安州乃靖遠屏藩逼近固原夙稱衝要之地因稔知本官才堪重任遂委令署理本州營

務以覘其能查該州被賊陳彭等屢次侵寇蹂躪已極
顛連凋敝之狀不堪矚目本官自署事以來加意撫綏
保固巖疆種種整飭靡有懈弛所著成效亦已有明驗
矣嗣因逆賊李黃鷹等大率賊衆直逼城下本官復能
以微兵堵禦誓與城為存亡隨機應變拒守無虞不獨
其才足用而其操守之堅更足以砥礪將士也且逆黨
節次煽惑非啖之以利則危之以誑甚至以李成芳偽
書相誘本官侃侃拒絕即行舉首誠所謂疾風中之勁

草者矣夫既以練達之才而抒其謀猷復以忠貞之守而凜其節操則雙龍之才節似難泯沒不叙況當茲僞言散布在在鼓簧尤宜亟為表揚以激勸人心者也今據前由除將逆書送部外臣謹會同撫臣華善合詞具題伏乞

皇上睿鑒勅部議覆施行康熙十五年四月初六日題奉

旨據奏署遊擊賀雙龍出首逆書忠貞可嘉著議奏該部知道

靖逆侯靖逆將軍兼管甘肅提督事務臣張勇謹

密題為飛報殺敗侵犯通渭逆賊事竊照康熙十五年四月十六日據駐防通渭水泉守備段為章知縣周玉田稟據哨探兵丁稟稱探得偽總兵四人率衆萬餘塵土蔽天將抵縣城等情卑職查本縣城內僅有防守步兵二百名今聞逆賊大衆來犯百姓驚惶盡皆出城逃竄兵少城空萬難死守卑職等無奈暫駐山寨理合飛報乞速發大兵以救地方等情據此臣隨會叅贊軍務

護軍統領臣傑印令其率領滿兵同臣標副將劉選勝
遊擊史孔筆安守正等帶領官兵于十七日自伏羌進
發又移甘撫臣華善遣中軍遊擊岳鎮邦同守備千把
各官并臣標守備張士奇等率兵從鞏昌速赴通渭撲
勦各去後本月十九日接護軍統領傑印報稱本統領
會同貴標中軍劉副將等率領滿漢官兵前赴通渭途
遇撫標遊擊岳鎮邦等兵馬遂合兵前進行至十八盤
坡遇見賊兵萬餘前來伏羌本統領會合劉副將等將

滿漢官兵分為兩路左右夾擊奮力齊進賊不能支敗
回通渭我兵尾追斬殺當時安遊擊同十總王友資等
奪東門而入逆賊從城內逃出劉副將等又率兵從城
外追殺正黃旗嘎喇昂邦同各章京率兵奪南門而入
鑲白旗統領夸哈等各滿兵從城外追殺賊衆披靡敗
奔上山計殺傷賊兵七百餘名活擒一百十四名得獲
大砲四位馬匹駱駝器械等項賞給有功人員詢據拿
獲賊兵供稱領兵係李總兵小李總兵陳總兵楊總兵

供畢俱行正法訖官兵欲乘勝攻勦因天色已晚次
日復會同各將領率滿漢官兵進攻三次奈賊已劄
定營盤立有木柵挨牌布列火器難以攻取遂收兵
對面安營等因又據副將劉選勝等塘報同前等情
到臣該臣看得逆賊狂逞率衆萬餘侵犯通渭欲合
川逆以連聲勢臣隨一面移會甘撫一面發兵撲勦
今據塘報將士奮力用命擒斬八百餘名仍復縣城
逆賊敗踞山頭我兵亦經安營等緣由雖一時未即

蕩滅根株然亦足以破賊之膽矣但我兵尚與賊營
相持兵力單薄臣處又無多兵可撥恐分禦不敷非
計之得隨飛移將軍臣佛尼勒提臣王進寶從秦撥
發滿兵五百名綠旗五百名俱到通渭會兵勦禦外
臣謹會同將軍臣佛尼勒撫臣華善提臣王進寶合

詞題

報伏乞

皇上睿鑒施行康熙十五年四月二十一日題奉

旨據奏逆賊侵犯通渭護軍統領傑印等率領官兵殺敗賊衆得獲砲銃器械等項恢復縣城具見調度有方將士奮勇可嘉在事有功人員事平之日議叙具奏該部知道

靖逆侯靖逆將軍兼管甘肅提督事務臣張勇謹

密題為飛報大敗逆賊事康熙十五年四月二十四日據副將劉選勝遊擊史孔筆岳鎮邦李守魁塘報稱前滿兵撤回伏羌卑職等奉有固守城池嚴禦逆賊勿令

竊赴秦川之令遵即入城防守外于二十二日辰時望見北山各賊營旗幟亂動卑職等一面整兵一面公議如賊東向赴秦則亟行堵勦如賊欲挑戰則留副將劉選勝率領官兵守城卑職等分頭迎敵正商議間乃見賊奔突下山內有偽總兵李黃鷹李建基等率領馬步賊兵五千餘名從西面偽陳總兵率領馬步賊兵三千餘名從東面俱皆直擁前來卑職等隨照前議留守城池外遊擊史孔筆帶領守備千把各官率兵從南門出

城岳鎮邦帶領千把等官率兵從西門出城李守魁帶
領千把各官率兵從東門出城逆賊見我官兵出城隨
行站隊三路官兵分頭向前奮力撲勦賊死拒不退從
辰至未鏖戰數陣賊始潰敗我兵隨後追勦逆賊仍上
北山當陣活擒偽官弁兵五十餘名內帶傷偽守備二
名偽千總四名偽把總五名搜獲偽劄十一張在陣殺
死賊兵五百餘名內殺死偽把總二名搜獲偽劄二張
問據擒獲偽官等供稱吳之茂王屏藩屢遣人往平涼

王輔臣處請兵前來秦州接應今此一陣若能取勝川賊必來平涼等語問畢俱經正法訖計奪獲棉甲火器旗幟器械等項俱經賞給有功人員除行間立功官兵及帶傷陣亡兵丁馬匹俟查明另行造冊呈報外所有殺敗逆賊情形并獲偽劄合先飛報等情到臣據此該臣看得逆賊前犯通渭已被滿漢官兵殺敗退據北山嗣據寧遠遊擊劉廷棟等報稱馬搗逆賊有出犯截餉之信臣因伏羌兵單遂移檄滿兵回伏仍檄催李守魁

速赴通渭同劉選勝史孔筆岳鎮邦等固守嚴防乃賊
探知撤兵遂來侵犯縣城經臣標副將劉選勝調度議
令遊擊史孔筆撫標遊擊岳鎮邦西寧鎮標遊擊李守
魁各率守備千把等官領兵分路夾勦自辰至未鏖戰
良久賴官兵奮勇直進賊始潰敗奔回上山當陣擒斬
逆賊官兵五百餘名共搜獲偽劄一十三張除偽官已
經正法盔甲器械旗幟火器等項賞給有功人員所獲
偽劄咨送兵部查燬外臣謹會同將軍臣佛尼勒提臣

王進寶合詞題

報伏乞

皇上睿鑒勅部議覆施行康熙十五年四月二十六日

題奉

旨覽卿奏遣發官兵於通渭縣地方擊敗賊衆擒斬甚
多得獲偽劄器械等項具見調度有方將士奮勇可嘉
在事有功人員著議叙具奏該部知道

靖逆侯靖逆將軍兼管甘肅提督事務臣張勇謹

題為衝鋒拔險大敗逆賊飛報捷音事竊臣前准撫臣
華善咨報偽李將軍有入犯岷州之信臣以岷州逼近
臨鞏恐被逆賊盤踞擬于二十四日親赴彈壓因撫遠
大將軍以樂門賊勢猖獗恐臣分兵往策莫資策應臣
遂留臣標中軍副將劉選勝防守伏羌臣于二十四日
帶兵到樂門會同都統臣巡察地形查賊札營一十一
座相為聯絡其南北山梁賊營二座相距都統營盤僅
有三里許賊思踞險連營以圍困我兵非大挫其鋒使

之喪膽恐蔓延日久則牢不可破矣臣等公議須安營于賊營山梁中間以分其勢併大舉精銳拔其南北二營使賊失其險然後用勦用撫勢如破竹也隨議將滿兵分為二股一股攻賊南營即以一股堵其援南之兵臣標官兵亦分二股一股攻賊北營即以一股堵其援北之兵并令滿漢各兵每一兵帶草一束以備填塞賊營壕塹之用計議已定于二十六日黎明都統臣遣發鑲黃旗參蘭大佛爾禾率領外委噶巴什章京等滿洲

官兵望賊南營進勦臣亦遣發前營遊擊安守正率領
守備李弘鑒張士奇外委守備王弘鼎等各官兵望賊
北營進勦二營逆賊布列烏鎗齊出拒敵我兵奮力撲
殺賊隨敗遁入營至已時樂門偽汪總兵率兵三千餘
從北路前來偽李將軍率兵三千餘從南路前來分援
南北二營不知臣等前議已遣鑲黃旗李蘭大蘇尼安
等領兵在河灘架梁預堵南來援兵復遣左營遊擊史
孔筆後營遊擊劉虎等領兵屯札山梁預堵北來援兵

故汪李二賊衝突數陣被我滿漢官兵分頭堵截鎗砲齊發賊遂敗奔不能進援而我進勦南北二營官兵仍復兩路攻擊鏖戰六陣奈三道壕塹加以鹿角挨牌我兵難于速拔至酉時傳令將所帶草束填平賊濠當先八旗滿兵合力齊進攻拔逆賊南營隨後綠旗官兵合力齊進攻拔逆賊北營二營既拔賊衆大潰東逃西竄各自奔命我兵尾殺因天黑不便遠追遂收兵回營沽捉賊兵三百餘名訊供北營偽總兵官姓裴不知其名

先被砲傷身死南營偽總兵姓白亦不知其名落崖跌死至次日天明查殺賊衆併跌崖死者計有十餘奪獲鹿角祚二千餘個揆牌一千六百餘面帳房六百餘頂併跌傷廝甲器械甚多當即給賞有功人員是役也皆仰賴我

皇上威福而將士用命故能衝鋒拔險大獲全勝其餘金息行見膽落魂消不敢狂逞矣所有傷亡滿漢官兵併倒斃馬匹俟查明造冊另報外再照甘撫臣華善布

政司伊圖因臣等兵馬急需糧芻特遣莊浪監收同知
高成美隨臣軍前招買并遣河州監收同知鄒廷伏羌
縣知縣張其捷西河縣知縣馮翼鼎原任隴西縣知縣
張琦買運策應俾滿漢兵食馬料不至告匱其勤勞亦
難泯沒相應一併題

報伏乞

皇上睿鑒勅部議覆施行康熙十五年四月二十八日

題奉

旨覽卿奏親率滿漢官兵于樂門等處地方分路進勦
攻破南北賊營擊敗來援賊衆擒斬僞總兵等得獲器
械等項具見籌畫周詳調度有方將士奮勇可嘉在事
有功人員著議叙具奏

靖逆侯靖逆將軍少保仍兼太子太保兼管甘肅提督
事務臣張勇謹

奏為恭謝

天恩事康熙十五年六月十八日准兵部咨為逐出海

彞等事奉

旨張勇著加少保兼太子太保欽此欽遵備咨到臣准
此臣即恭設香案望

闕叩頭謝

恩訖竊臣猥以菲材謬膺重寄疊荷

皇仁屢沐

寵眷

授以將軍既承節鉞之重

錫以侯爵復叨帶礪之榮頒

勅命於師中隆事權於閭外人臣遭遇之奇至此極矣
乃以恢復河洮諸州復蒙

特加少保之職夫公孤師保秩至崇也原以酬異績殊
勛克建非常之業者臣徒以征討微勞濫受

曠典感泣之餘實深惶悚擬欲具疏懇辭恐違

成命致負

天恩謹刻骨鏤心祇供厥職用殫犬馬之私以報

高厚之德者矣伏乞

皇上睿鑒施行康熙十五年六月十九日奏奉

旨該部知道

靖逆侯靖逆將軍少保仍兼太子太保管甘肅提督事務臣張勇謹

題為夾勦逆賊大獲全勝事竊照川逆盤踞樂門連營一十九座臣慮兵力單薄勦禦不敷隨飛咨陝西提臣王進寶移兵前來以壯聲援於六月十九日提

臣帶兵前至樂門札營大河北岸以衛糧道詎賊乘
提臣壁壘未定欲為劫營之計大率馬兵三千餘衆
同步賊相繼渡河直望提臣營中衝突而來當經提
臣遣發本標右營遊擊李守魁率領千總李日榮把
總王和善等首先迎敵去後并親督前營遊擊郝善
永泰遊擊趙光榮等官兵前進飛騎報臣臣令其從
河北往南迎勦臣隨一面留臣標中軍副將劉選勝
固守營盤一面撥發左營遊擊史孔筆前營遊擊安

守正後營遊擊劉虎金塔寺遊擊李進江山丹營遊擊邊永昌各領守備千把等官兵從河南往北迎勦與遊擊郝善等所帶往南一股官兵共作環圍之勢併會都統臣黑葉副都統臣奚福率領各旗滿兵從中截擊臣亦從後督陣滿漢官兵奮力齊進分頭夾擊四面圍勦逆賊面面受敵左衝右突力不能支遂披靡大潰被箭傷刀砍者尸橫遍野投河落崖者不計其數生擒偽總兵張興偽副將雒世仲偽遊擊張

承耀等并獲偽劄四張活捉精健鎗甲賊兵一百三十八名俱即正法訖並於陣斬屍內搜獲叅遊守千把等偽官劄付三十一張與生擒偽官劄付共五十六張奪獲馬匹盔甲器械當即給賞有功人員是役也皆仰仗

皇上威福而將士用命所致從此餘逆望風落膽不敢狂逞而蕩平疆土亦勢如破竹矣但查西寧鎮標後營千總王之福因撲入賊隊奮往直前頭中片刀當陣身

殞深為可憫似應優卹以慰忠魂所有行間有功官員及傷亡官兵倒斃馬匹俟查明造冊另報并将偽劄咨送兵部外臣謹會同提臣王進寶合詞具

題伏乞

皇上睿鑒勅部議覆施行康熙十五年六月二十二日
題奉

旨覽卿奏會同都統黑葉等率領滿漢官兵于樂門地
方擊敗賊衆擒斬甚多活擒偽總兵副將等得獲偽劄

馬匹器械等項具見調度有方將士奮勇可嘉在事有
功人員著議叙具奏王之福作何恩卹著議奏兵部知
道欽此查樂門節次殺賊功績現今行令靖逆將軍侯
張勇等造冊應俟各案有功官員清冊送到之日一并
彙叙至傷亡兵丁應聽該將軍酌量賞卹陣亡千總王
之福係功加署守備應照現任職銜議叙廕子弟一人
以衛千總推用卹銀一百五十兩可也奉

旨依議

靖逆侯靖逆將軍少保仍兼太子太保管甘肅提督事務臣張勇謹

題為塘報大敗逆賊事康熙十五年七月初三日據領兵遊守桂奇李進江等報稱于七月初一日奉令領兵前到岷州宕昌地方准各土官報稱逆賊有五千餘衆聞知將軍遣發大兵前來即于二十八日移兵前去梨川等由卑職等隨會同遊擊劉大明柳開甲領兵前往追勦行至哈塔鋪見賊兵數百出沒其間卑職等率兵

撲勦殺死賊兵數十名活擒六名問據供稱賊在梨川
地方川裏下營等語卑職等遂直趨梨川果見賊營三
座隨分兵三路合力進勦齋標左營守備桂奇遊擊李
進江等帶領鞏營千把總各官兵分為中路嘉峪關遊
擊劉大明西寧鎮標守備柳開甲帶領嘉峪關各官兵
分為左路山丹營遊擊邊永昌等帶山丹營各官兵分
為右路共三路齊進奮力撲勦連殺數陣遂賊大敗陣
斬千餘名中傷者更多活捉七十二名餘賊逃匿山林

因山路崎嶇松林深邃難以尾追遂公同收兵回營所有奪獲馬匹盔甲鳥鎗長鎗弓箭腰刀等項并傷亡官兵馬匹俟查明另報等情到臣該臣看得逆賊盤踞岩昌官軍對壘相持因偽將軍李良柱率賊寇犯岷州臣亟親統官兵赴岷援勦于本月二十九日到新寺鎮據塘報偽李將軍亦到岩昌各土官番族被賊迫脅每日數次請兵救援臣因瘡病之餘天氣暑熱晝夜行間一時昏暈兼以山路狹隘遠難前進遂遣左營守備桂奇

遊擊李進江邊永昌守備邵廷臣等率兵兼程前進援
勦去後續于七月初二日到漳縣據遊擊李進江等塘
報追賊至梨川大敗賊衆得獲器械帳房甚多此雖將
士協力効命實仰賴

皇上天威遠播之所致也除將得獲器械等項檄令賞
給有功人員及陣亡兵丁馬匹俟查明另報外事闖殺
敗逆賊理合題

報伏乞

皇上睿鑒勅部議覆施行康熙十五年七月初三日題

奉

旨覽卿奏遣發官兵于梨川地方殺敗賊衆得獲器械等項具見調度有方將士奮勇可嘉在事有功人員著議叙具奏兵部知道

靖逆侯靖逆將軍少保仍兼太子太保管甘肅提督事務臣張勇謹

奏為微臣病勢日危恐悞邊疆重任懇乞亟

簡賢能以資彈壓事臣自本年二月內奉

旨赴寧因痰火病發精神昏亂唯以安撫地方事屬重
大乃肩輿就道星夜奔馳于三月初一日行至中途忽
自顛仆幾不能甦及抵鞏昌藥餌調治稍有起色又飛
赴伏羌樂門等處扶病勦賊奈箭毒久傷元氣耗散不
過兩三日內即發暈數次兼以腿瘡纏綿不時腫痛遍
體麻木舉動艱難此臣近來病勢危篤之狀滿漢官兵
所共目擊者也伏念臣蒙

世祖章皇帝拔于儔類之中復荷

皇上寄以腹心之重計受

兩朝知遇之恩于茲三十有餘載矣其間

寵眷之日隆

賞賚之獨厚不一而足臣思天地之愛物靡所不周父
母之愛子無所不至今

皇上之待臣如此亦即

天地父母也臣豈土木為心而有不思忘身家捐頂踵

以仰答

高厚于萬一而顧以病篤之故屢疏乞休者非為疾痛
莫支自圖安逸之計亦非性命念重欲為靜攝之謀而
臣之所以力辭解任者實為封疆起見也蓋甘肅為三
秦門戶提督為三鎮綱維當茲亂臣內叛海晏外伺之
時即以強幹精明者分符坐鎮猶慮區畫偶疎有乖佈
置況以病臣竊位其中萬一所在告警非臣瘡痏難行
之日即臣瘻壅暈迷之際師無所統則兵不用命必致

倉皇失措策應莫及斯時也臣雖蠶粉恐不足以贖其
辜矣若夫裹屍還葬臣自筮仕以來即以此念自矢肝
腦塗地正臣死得其所之時斷非以愛身之故而疊
請休致也但臣前疏奏辭奉有

不必以疾求罷之

旨或者

皇上察臣在邊日久頗諳情形故不以衰殘困憊而加
擯斥然今日四海景從懷瑾握瑜足備干城之選者實

繁有人如臣一息雖存奄奄待斃又何足補耶泣懇

皇上俯念巖疆重地

鑒臣病勢危篤迅

簡賢能星馳代任

准臣赴京醫治倘邀

聖庇得延殘喘是臣之餘生皆賴我

皇上之覆載也如委滇溝壑而邊圉得人獲保清晏臣
亦瞑目于地下矣臣不勝惶悚待

命之至謹具

奏請

旨康熙十五年七月初四日奏奉

旨卿長才偉畧久鎮巖疆矢志忠貞力圖報國勦禦賊寇恢復地方安輯兵民勞績茂著奉省軍務方殷正資料理著勉加調攝益殫壯猷以副朕倚任之意不必以疾求罷該部知道

靖逆侯靖逆將軍少保仍兼太子太保管甘肅提督事

務臣張勇謹

密題為急

請鎮臣統練新兵以資分防事竊照興安鎮屬官兵經
臣題

請照依原額召募業奉

俞旨臣隨會同甘撫并甘西二鎮各行招募并馬匹招
中牽領計自本年正月起至六月終止臣同撫鎮各臣
共計募有馬步兵五千五百有奇但不便令其坐糜糧

餉查今川賊敗遁各隘需兵應將所募之兵撥防分禦
惟是新募之衆操演訓練必須裨員管轄方為有制之
師故興鎮原設新增副叅遊守等官臣與督臣遴選賢
能隨才

題補然三軍無司命之主勢必渙散而各將無總理之
樞亦將懈怠是新募之兵與新補之將控制得當指臂
相須者惟鎮臣是賴耳伏乞

皇上簡選賢能擢授興鎮庶兵馬得有統率用以分

守各隘實有裨也再照應募興漢鎮屬之兵共計一萬五千有奇今地方尚未恢復一鎮似難率理況秦徽鳳隴各要地既恐外虞又慮伏莽必須分行彈壓防禦方周應將前裁補秦州總兵朱衣容并暫駐秦州漢中總兵費雅達俱令其速抵秦州分統新兵則訓練防禦均有攸賴矣至于平涼已經歸誠則提臣王進寶應專管陝西提督事務其西寧原缺請祈

睿鑒另簡賢員迅赴任事俾要地得人而巖疆永固也

臣謹會同督臣哈占合詞具

題伏乞

皇上睿鑒勅部議覆施行康熙十五年七月十三日題

奉

旨議政王貝勒大臣會議具奏欽此查撫遠大將軍圖海題請令提督王進寶駐劄固原原總兵朱衣容駐劄西寧管西鎮事等語臣等會議俱如大將軍所題此疏無庸另議至稱應募興漢鎮屬一萬五千有奇之兵

一鎮似難率理等語今朱衣客已授西寧總兵其興漢
鎮屬兵馬作何分轄之處聽靖逆將軍侯張勇總督哈
占提督王進寶公同會商確議具題可也奉

旨依議



張襄壯奏疏卷四

欽定四庫全書

史部

張襄壯奏疏卷五

詳核官國子監司業臣納麟寶

編修臣裴謙覆勘

總校官編修臣倉聖脉

校對官中書臣李紇

謄錄監生臣張恒

欽定四庫全書

張襄壯奏疏卷五

甘肅提督靖逆侯張勇撰

靖逆侯靖逆將軍少保仍兼太子太保管甘肅提督事務
臣張勇謹

密題為照額設兵并補守備以資防禦事竊照逆賊倡亂淪陷階文臣前題准將階副將改為洮岷副將而副將營原設兵馬襄因軍需尚訛故未經照額募補唯

以洮岷叅將營額兵五百并副將楊朝樑不食糧餉之
土兵五百充伍湊合副將營制以為權宜之計今楊朝
樑已經休致土兵五百隨行帶回而洮岷副將營止存
兵五百名今階文見議歸誠臣擬遣兵前去安撫而分
布實苦不敷查階州額設馬戰兵三百名步戰兵四百
名守兵三百名文縣守備營馬戰兵五十名步戰兵一
百五十名守兵二百名西固城守兵一百一十名則洮
岷協營兵數當準階協舊制而文縣西固亦應照原額

募補庶可以分防各隘戰守有資矣再照西固城原設
守備一員今地方恢復急需能員查得河州營把總杜
道隆調征一年有餘屢著戰功且膂力超眾才技兼人
堪以擬用西固城守備除臣一面行令洮岷副將呂天
玉階州遊擊吳掇桂文縣守備馬任遠并委把總杜道
隆各速行召募外謹會同督臣哈占甘撫臣華善提臣
王進寶合詞具

題伏乞

皇上睿鑒勅部議覆施行康熙十五年七月二十五日

題奉

旨兵部知道欽此查階州副將營原額馬步兵一千名先經該將軍題准將洮岷叅將改為副將添兵五百名階州副將改為遊擊裁去兵四百名其洮岷營應添兵五百名即以楊朝樑自養土兵充額不費糧餉暫行守禦地方今該將軍既稱楊朝樑土兵五百已經帶回洮岷營兵數當準階協舊制并文縣西固亦應照原額募

補可以分防各隘戰守有資等語均應照該將軍所題
杜道隆係把總不應越陞守備該將軍既稱杜道隆調
征一年屢著戰功等語應准陞以署守備管陝西西寧
西固城守備事可也奉

旨依議

靖逆侯靖逆將軍少保仍兼太子太保管甘肅提督事
務臣張勇謹

題為恭

報暫停召募以省兵餉事竊照召募興漢二鎮屬原額
新設官兵共計一萬六千有餘今臣已募有八千四百
餘名又督臣先經募過漢鳳兩郡及舊縣關地方二營
兵共一千一十五名漢中鎮臣費雅達募兵一千一百
餘名共募兵一萬五百餘名未募之兵尚少五千餘名
臣因前赴秦州與撫遠大將軍會商機務并酌議興漢
二鎮所有召募未足之兵應行停止蓋逆賊已經逃遁
則二鎮所屬各營地方可以節次恢復俟到彼時即將

恢復之兵選充原額既可省先支之餉復可免召募之煩臣遂移行各標營將見在已募之兵收伍操練其未募之兵飭令暫停去後所有新兵應需旗幟已經製造將完馬匹亦已領配二千八百匹唯所需盔甲器械等項俟臣抵蘭後將見募之兵分定馬步戰守額數督造報竣分給配用之日造冊報部理合

題明伏乞

皇上睿鑒勅部議覆施行康熙十五年九月十三日題

奉

旨兵部知道欽此查該將軍侯既稱興漢二鎮屬未募之兵尚少五千餘名臣與撫遠大將軍會商俟各營路地方恢復即將恢復之兵選充原額可省金錢應暫停止等語應如該將軍侯所題將興漢二鎮屬未募兵五千餘名停其召募可也奉

旨依議

靖逆侯靖逆將軍少保仍兼太子太保管甘肅提督事

務臣張勇謹

奏為恭謝

天恩事康熙十五年九月二十日准兵部咨為欽奉

上諭事該議政王等會題前事內開康熙十五年八月

二十日奉

上諭諭兵部自逆賊煽亂以來奸徒附和侵擾地方闢
隴以西疆域遼闊大兵一時未集人心不無動搖靖逆
將軍靖逆侯張勇提督王進寶鎮臣孫思克一聞蘭州

之變即統領兵馬星馳渡河勦殺賊衆攻圍蘭州臨葦等處恢復城池條奏機宜舉發偽劄拿獲奸細綏靖邊陲其功甚大及大兵攻取平涼專任靖逆侯張勇等鎮守秦鞏復殲心籌畫調度合宜勦禦川賊屢奏捷音紓朕西顧之憂厥功尤為茂著伊等皆夙將重臣矢志報國同心協力展布謀猷兼以訓練士卒忠義素孚故能身先行陣所向克捷其屬下官員兵丁亦皆効力共建功績朕甚嘉之于軍功議叙之外應從優加恩以示朕

獎勵忠貞酬答勲勞至意著議政王貝勒大臣會議
奏特諭欽此該臣等會議得

上諭內靖逆將軍靖逆侯張勇提督王進寶鎮臣孫思
克攻圍蘭州臨鞏等處恢復城池綏靖邊陲其功甚大
復殫心籌畫調度合宜緣朕西顧之憂厥功尤為茂著
伊等皆夙將重臣矢志報國忠義素孚其屬下官員兵
丁亦皆効力共建功績朕甚嘉之于軍功議叙之外應
從優加恩以示朕酬答勲勞至意欽此除將軍侯張勇

提督王進寶鎮臣孫思克于軍功議叙外其靖逆將軍
侯張勇係三等侯今優加以拖沙喇哈番授為二等侯
提督王進寶冊開係阿思哈尼哈番今優陞為二等阿
思哈尼哈番給與將軍名色仍兼管平涼等處提督事
務查鎮臣孫思克無世職今優授為三等阿達哈哈番
授為涼州提督仍聽靖逆將軍侯張勇節制至給與王
進寶將軍名色之處交與內閣其張勇添撰
勅書及王進寶孫思克換給

勅印之處交與內閣吏部禮部可也等因康熙十五年

八月二十三日題奉

旨張勇王進寶孫思克勦禦賊寇功著巖疆矢志忠貞
克副倚任張勇著從優加為一等侯王進寶著優陞為
一等阿思哈尼哈番授為將軍仍兼管平涼等處提督
事務孫思克著優陞為一等阿達哈哈番涼州提督餘
依議欽此欽遵備咨到臣准此竊自吳三桂變亂以來
三秦擾動臣所屬河東臨華等處悉遭淪陷

皇上不加譴斥俾得戴罪恢復仰叨

寬典已出望外且荷

特恩加臣將軍之職畀以事權用資彈壓及吳逆投送
偽劄臣即繳部具疏首報復蒙

恩旨賜爵通侯臣自維才薄疇膺

寵遇乃濫竽名器實夙夜抱慙今臨輩各地方雖節次
克復然失而復得功不掩過况川逆現在盤踞勦禦方
殷臣恨不能滅此朝食以抒

廟堂西顧之懷何敢復因擾攘屢捧

絲綸茲又欽奉

上諭加臣一等侯爵拜

命之下深切惶悚臣有何功而過沐

湛恩有加無已此誠古來將臣所不易得之數庸劣如

臣竊叨

曠典不禁感泣失聲愈自奮激從此秣馬礪兵務期妖
氣立靖以仰報

高厚於萬一且除臣恭設香案望

闕叩頭謝

恩訖為此理合具

奏伏乞

皇上睿鑒施行康熙十五年九月二十七日奏奉

旨覽卿奏謝知道了該部知道

靖逆侯靖逆將軍少保仍兼太子太保管甘肅提督事

務
臣張勇謹

題為彙報傷亡官兵懇乞循例恤賞以廣

皇仁以鼓士氣事案照河西自去歲用兵以來衝鋒撼
陣者屢矣其間克捷獲勝將士實與有力似當一體仰
邀

恩卹况披堅執銳奮不顧身以致或傷或亡其忠魂廢
體尤宜倍加憐憫者也查官有戰功兵有傷亡者業經
照案題

報奉有

事平議叙之

旨臣隨將行間有功人員造冊送部議敘外唯前後對敵傷亡各兵未蒙議卹臣思疆場殞命者家失所依肢體殘缺者身屬無用苦況莫告魂魄哀號每一念及為之痛心茲奉

大典恤賞下頒則此傷亡官兵相應循例優卹以勵人心者耳今臣准據甘寧撫臣華善奮威將軍王進寶涼州提臣孫思克臣標中軍副將劉選勝各將所屬標營

節次殺賊官兵開列對陣身亡日期并被傷處所分別
輕重彙造清冊前來除將原冊送部外臣謹合詞具

題伏乞

皇上睿鑒勅部議覆施行康熙十五年十一月十七日

題奉

旨兵部議奏欽此除陣亡官員已經議給恩卹應無庸
再議外今該將軍侯張勇既稱傷亡官兵似宜循例優
卹等語其被傷官兵陣亡兵丁應聽該將軍侯照例賞

卹仍造冊報部可也奉

旨依議

靖逆侯靖逆將軍少保仍兼太子太保管甘肅提督事務

臣張勇謹

題為軍需孔亟殲力捐貲以報

國恩事竊自叛逆變亂以來警息頻聞所在淪陷雖天威遠播金底遊魂不久殲滅然轉輸糧餉購買馬匹

製造甲械賞賚將士糜費

內帑之金錢亦已不貲矣臣一介武夫每聞古人家散
萬金之語恨不能追蹤往蹟以報

兩朝知遇之恩去歲河東告變臣統師撻伐用彰
天討唯是軍前所需用度浩繁司農方在持籌而計臣
子敢萌身家之念故臣不憚傾囊倒篋多方拮据隨事
補苴務期士飽馬騰軍容整肅兵心踴躍以奏剋期蕩
平之績并以少盡破家為

國之心也案查糧糈為用兵急務臣慮蘭州殘破之後

井里蕭條兵馬到蘭未免倉皇措餉臣待罪河西二十
餘載其蓄藏糧米之家聞之頗稔遂於甘州永昌莊浪
等處勸諭積儲人戶常時奏張大槧等一千二百七十
四家借出現糧三萬四百五十七石照時價給發銀兩
在甘州者交甘州道廳在永莊者交涼莊道廳并移會
甘撫臣華善轉檄各道廳衛親行下鄉催運至蘭而蘭
州各標營兵食始克有濟此臣捐貲辦餉業經甘寧撫

臣華善題

報在案又逆賊鴟張六郡失陷雖

王師四出所至克復而追奔逐北非馬莫資又况對壘
相持馳驅靡息晝夜奔勞倒斃者衆臣隨會知甘撫臣
華善於十四年內捐銀一萬一千餘兩在西寧莊浪甘
涼肅州產馬處所陸續購馬一千三百餘匹并覓買草
料喂飼嗣因倒馬過多又於十五年內捐銀一萬四千
五百餘兩購馬一千七百餘匹前後共捐過銀二萬五
千七百兩買馬三千二百匹征勤臨蘭鞏秦以及伏羌

西和樂門通渭馬塢等處計今兩載有一兵倒馬十匹或七八匹五六匹不等隨倒隨給故戰馬賴以不缺此甘撫臣華善所目擊者又臣標營制新設所有配兵藍布盔甲率多督鎮撥給歷年已久類皆損敝似難以壯軍威臣自渡河以來捐貲改製雜色緞面盔甲一千頂副用過銀八千餘兩故四處征勦軍裝明亮有先聲奪人之勢此亦甘撫臣華善所目擊者又臣駐劄伏羌堵截秦州逆賊時大兵赴勦樂門當有樂門鄉民數千齊

奔伏羌涕泣稟稱麥豆穀稻青苗俱被大兵馬匹踐食
等情臣隨令臣標中軍副將劉選勝伏羌知縣張吉捷
查勘回稱兩山悉係賊兵屯劄大兵馬匹無處放牧不
得已作此權宜之計臣即與百姓估買公議定價每青
苗一畝給銀三錢東至西寧鎮西至樂門鎮一帶青苗
共給過銀三千六百四十兩以牧養滿漢官兵馬匹此
都統臣黑葉副都統臣奚福所共知者又王輔臣原遣
偽總兵李國樑李師膺帶兵二千前去秦州接應偽將

軍王屏藩赴援平涼而李國樑甫至樂門王輔臣見援兵不至已率平慶固原等處投誠臣即會同都統臣黑葉提臣王進寶遣人頒諭李國樑等回兵李國樑接諭遂于十五年六月二十四日二更起營飛回平涼川逆知失所恃亦於次晚棄營奔遁臣恐官兵追勦道路多被挖掘因思大路有一高橋若為賊拆斷而我追兵不能飛渡隨遣後營遊擊劉虎功加叅將武自成等帶兵一千餘名鳥鎗五百名每兵賞銀四錢官三員各賞銀

三十兩共賞銀六百九十餘兩以示鼓舞令各官兵乘
夜步行星速到彼防護勿致有悞軍機去後嗣據劉虎
等稟稱卑職於四更時候俱到高橋賊於五更欲來拆
毀見我兵防守不敢進前等語而高橋賴以不斷追勦
之兵始不至望洋興歎矣計臣前後所捐銀兩職分宜
然何敢瑣亵上陳致瀆

天聽惟是改造盔甲措購馬匹計運糧餉防護河梁悉
關緊急軍務故臣勉力捐貲以少佐征勦之用者耳謹具

本報明伏乞

皇上睿鑒施行康熙十五年十一月二十九日題奉

旨覽卿奏捐貲買馬製造盔甲給賞兵丁具見急公可嘉著議叙具奏兵部知道欽此查見今各省捐助盔甲器械等項俱照捐助袍帽之例議叙五百兩以上准加一級如有多者照此加級今靖逆將軍侯張勇於用兵之際審度時勢緊急捐資買馬製造盔甲給賞兵丁相應照例議叙但該將軍侯張勇前後共捐銀三萬八千

餘兩所捐銀數甚多查張勇見係靖逆將軍一等侯少保兼太子太保侯爵無照例可加之級應否加官保銜伏候

上裁奉

旨張勇著加少傅兼太子太傅

靖逆侯靖逆將軍少傅兼太子太傅管甘肅提督事務
臣張勇謹

奏為臣病已危萬難供職特舉賢能憲

允代任無悞巖疆事案照先為微臣病勢日危等事臣業已具疏乞休隨奉有

奏省軍務方殷正資料理不必以疾求罷之

旨臣不覺感激涕零自念

君恩深厚如此祇恐廢病有悞

付託此外又何計焉故自駐蘭以來延醫診治冀獲稍痊俾得以未盡之餘年竭蹶圖報不料病勢日見危篤藥餌毫無效驗於二月中旬兩手俱腫至輕莫舉又於

足面受傷之旁疎發擁腫詢之醫者皆云箭中有毒
年久移注之故又兼痰火上蒸氣喘咳逆飲食漸減形
體尪羸囊尚賴人扶上肩輿今竟仰卧牀褥一加扶掖
則百痛交作是臣雖一息尚存亦不過奄奄待斃而已
伏思臣以一介武夫遭逢

聖世分符專閫位列通侯死何足惜但受

兩朝寵眷之隆不能為

國討賊盡掃妖氛裹革還葬少効涓埃此不無遺憾耳

目今諸寇奔遁秦省雖安然臣所轄地方悉屬衝險倘
控制不得其人隱憂靡細臣今命若懸絲危在旦暮料
難戶素查涼州提臣孫思克韜畧夙裕膽智兼優且在
邊日久曉暢情形素為番彝所畏服以之代臣甘肅提
督綽有餘裕矣至於甘肅鎮缺查永昌副將達爾護謀
猷久著諳熟兵機自受職以來實心任事靡有懈弛如
前歲臣與二鎮統兵征勦該副將留守河西時則警報
頻聞羽書旁午獨能防禦嚴密疆土賴以無虞洵為已

試之明驗也泣懇

皇上俯憐臣病已入膏肓甘肅為秦重地特降
俞旨將提臣孫思克代臣員缺以副將達爾護補鎮庶
可朝拜

命而夕赴任巖疆大有攸賴矣此臣如鳥哀鳴思欲以
人事

君故不避嫌特舉所知臣無任懇切惶悚待

命之至為此具本謹

奏請

旨康熙十六年三月十九日奏奉

旨卿長才偉畧久鎮嚴疆矢志忠貞勞績懋著地方雖
經底定正資料理著勉加調攝益殫壯猷以副朕委任
至意不必以疾求罷該部知道

靖逆侯靖逆將軍少傅兼太子太傅管甘肅提督事務
臣張勇謹

奏為恭謝

天恩事康熙十六年四月十二日准兵部咨為請

旨事內開該臣等會議得靖逆將軍張勇授為一等侯奮威將軍王進寶授為一等阿思哈尼哈番並未議及世職幾次之處查海澄公黃梧准襲十二次伯周全斌准襲一次等語今靖逆將軍侯張勇奮威將軍王進寶等圍攻蘭州臨鞏等處恢復城池著有功績相應將張勇一等侯准襲十次王進寶一等阿思哈尼哈番准襲八次俟

命下之日交與吏部轉揭內閣撰給

勅書可也等因奉

旨依議欽此欽遵備咨到臣准此竊照錄勳紀勛雖為國家之鉅典而光前裕後尤屬臣子之殊榮臣以微勞謬膺侯爵晉崇階於五等軍旅兼司叨異數于

九重恩施屢渥固已

澤流閫外歡徹師中者也乃於城池恢復之時更議襲職相承之數以帶礪綿夫十世聿騰遞爻之輝知河山

奠於萬年彌永

賞延之慶但媿無功受

寵實深濫竽名器之慚所望有子克家庶幾少效涓埃
之報從此生生世世長懷

雨露之恩行見子子孫孫共凜

絲綸之重者矣除臣恭設香案望

闕叩頭謝

恩外理合具

奏伏乞

皇上睿鑒施行康熙十六年四月二十九日奏奉

旨覽卿奏謝知道了該部知道

靖逆侯靖逆將軍少傅兼太子太傅管甘肅提督事務

臣張勇謹

奏為恭謝

天恩事康熙十六年七月十五日接臣男大理寺少卿

臣張雲翼家報內稱六月二十六日蒙

太皇太后命內使戛爾兔到家口傳

懿旨問男母併男兄弟

賜瓜菓二十籃男叩頭謝

恩祇領訖等情臣聞報感悚踧踖靡寧恭惟

太皇太后啟

先皇帝以成耆定之勲復同

皇上共致太平之治薄海内外靡不瞻仰

徽音臣以一介武夫受知

兩朝恩遇優渥茲得

賜第京師近依

輦轂固已榮逾望外乃荷

聖慈俯念微臣妻子

恩賜爪菓臣鏤心志感揣分難安喜降

慈廷溫語恩同霄漢之高欣逢

中使傳

頌香奪蓬萊之氣此皆

皇上眷顧有加是以

太皇太后寵賚獨厚臣緣遠任邊陲弗克趨叩

闕下惟有北望感忭遙祝

椒闈無疆之壽耳臣謹恭設香案望

闕叩頭謝

恩訖為此理合具奏伏乞

皇上睿鑒施行康熙十六年七月二十五日奏奉

旨覽卿奏謝知道了該部知道

靖逆侯靖逆將軍少傅兼太子太師管甘肅提督事務

臣張勇謹

奏為恭謝

天恩事康熙十六年十一月二十八日准兵部咨為欽

奉

上諭事內開奉

旨張勇著以少傅兼太子太師餘依議欽此并發到議
叙過臣標及各標營將弁加銜劄付到臣臣即率領各

官恭設香案望

闕叩頭謝

恩訖竊臣以殘廢之軀屢荷

皇恩覃及即肝腦塗地實難報稱而征勦各處賊寇恢復地方雖各將士之用命皆賴我

皇上之神謨也今蒙

特恩加臣太子太師臣標屬員俱蒙

優叙加銜拜

命之下偏裨踊躍以歡呼士卒激勵而鼓舞唯願早靖
妖氛仰舒

宵旰臣等自當各殫忠誠共勉厥職以少酬

高厚于萬一耳謹具奏

聞康熙十六年十二月十二日奏奉

旨覽卿奏謝知道了該部知道

靖逆侯靖逆將軍少傅兼太子太師管甘肅提督事務

臣張勇謹

題為兵分五路進取漢興以圖大舉入川事竊自吳逆
背叛以來我兵屢挫其鋒以大勢觀之賊亦不久自潰
矣但逆賊目下以川蜀為巢穴以漢興為藩籬進戰退
守全在於此我必破其藩籬始能入其巢穴故今日欲
為入川計不得不亟取漢興也聞撫遠大將軍公圖海
有分兵二路攻取漢興之疏在大將軍雖自有見然以
臣愚慮蜀道險阻所在遼濶兩路分兵未免單薄益兵
有不得不合者合之則敵有望風披靡之勢兵亦有不

得不分者分之則敵有應接不暇之勞今欲取漢興非由五路進兵不可所謂五路者欲取興安不得不分兵為二路而出也查鄖襄西連洵陽應將鄖襄官兵并去歲平羅叅將全卿王珍李師膺等領赴湖廣三千之兵或鄖撫或鄖提率領此一路前抵洵陽再將陝西一路官兵命將統率由商州南抵洵陽有此兩路兵馬俱會集于洵陽一齊進取興安如摧枯拉朽矣其次欲取漢中不得不分兵為三路而出也查黑水峪一路出接洋

漢可至漢中之東又連雲棧一路可至漢中之北又畧
陽一路接連沔縣可至漢中之西此三路官兵訂期齊
進以取漢中亦如風行草偃矣然後以五路之進發分
逆賊之兵勢或突其前或襲其後或攻其腹心或擊其
左右使賊四面受敵倉皇失措各思敗遁內變自作於
是大舉破蜀可一鼓而下也若慮糧芻難繼則臣有官
兵齊集漢興等事一疏暫且駐守亦養銳待時之一策
應否可行臣未敢擅便理合題

請伏乞

皇上睿鑒勅部議覆施行康熙十七年三月初三日

題奉

旨議政王貝勒大臣會議具奏欽此查陝西滿洲綠旗
大兵分為兩路進取漢中興安已經會同撫遠大將軍
公圖海具題相應將將軍侯張勇所題無容另議奉

旨依議

靖逆侯靖逆將軍少傅兼太子太師管甘肅提督事務

臣張勇謹

題為官兵齊集漢興秦省轉運莫繼宜駐商州西和隘口以豁民累事准撫遠大將軍公臣圖海咨准兵部咨為進取漢興事奉

旨議政王貝勒大臣會議具奏欽此會議得征勦逆賊固守陝西之處既已倚任大將軍公圖海及將軍侯張勇等其作何留守官兵以期陝西無虞作何統領官兵征勦逆賊進取漢興等處應聽大將軍公圖海將軍侯

張勇等公同確商酌量而行至於秦省滿漢官兵為數
不少所稱留守大兵似屬單薄之處母容議等因康熙
十七年二月十八日題本日奉

旨依議速行欽此欽遵備咨到本大將軍准此合咨貴
將軍侯煩為查照奉

旨內事理詳細妥議速覆等因移咨到臣准此業將臣
宜移駐莊浪適中之地以彈壓三邊并戰守一切事宜
既經大將軍籌畫允當相應仍照前議進取漢興等緣

由咨覆在案但臣細思目下兵馬四集克取漢興雖指
日可待而既克之後必將乘勝破蜀查川蜀層巒疊嶂
賊已踞為巢穴所有險路懸橋必皆毀拆以為固守之
計兼以地多瘴癘暑濕薰蒸以大勢觀之似難速進不
得不將三邊進征之兵分防各口獨是調征兵馬幾及
五萬有奇曠日持久盡駐漢興恐漢興殘破之後糧芻
必無所出計唯有責令陝西七府輓運以濟兵食但秦
民三載疊遭兵燹家室流離顛連萬狀今若再有運濟

之累行見逃亡死徙貽悞軍需誠靡細也莫若止守商州迤西西和迤東各隘口令滿洲綠旗等官兵暫且就食本處然後相機入川則可省險道之轉輸即以培閭之元氣所全實大矣臣為

國計民生起見應否可行仰祈

皇上睿鑒勅部議覆施行康熙十七年三月初三日題

奉

旨議政王貝勒大臣會議具奏欽此查已於將軍侯張

勇五路進攻川蜀可圖若慮糧芻難繼宜暫且駐守疏
內議覆此疏無容另議奉

旨依議

靖逆侯靖逆將軍少傅兼太子太師管甘肅提督事務
臣張勇謹

題為咨請就近

題補邊堡守備以資防禦事康熙十七年三月初一日
准涼州提臣孫思克咨稱寧遠彈丸小堡孤懸在北邊

闔門以外專司哨探並無附近營堡可以應援且當昌寧湖與兔兒砂野馬川紅峴兒腰一帶邊外草地俱係哈兒罕套彝往來叵測之地堡小兵單最難防禦倘任用非人易為邊患今原任守備孫傳臚積勞病故所遺員缺應宜靜候部推本提督何敢妄行請補但邊疆與內地不同現今海彝恣肆遊牧靡常驅逐不從抗違如故非得熟識邊情深曉地利恐難勝任斯職查得本標右營功加都司僉書管千總事任鳳翔歷任邊營膽略

素裕才技優長且定例千總歷俸已滿六年者例應陞遷今本官現任千總歷俸既深亦應陞以守備員缺况効力年久勤勞素著連年出征屢立戰功見蒙

恩加都司僉書正合推補守備員缺合無咨請將任鳳翔題補寧遠堡守備人地既已相宜銜缺又復相當循例保結咨請查照題補等因到臣准此該臣看得寧遠堡設在北邊之外最為險要必須熟識邊情素練行陣者方克勝任今該提臣既以歷俸年深征勦著功久事

邊陲人地相宜之功加都司僉書管千總事任鳳翔請
補該堡守備循例具結保舉前來除印結履歷冊送部
外臣謹會同督臣哈占甘撫臣鄂善提臣孫思克合詞
具

題伏乞

皇上睿鑒勅部議覆施行康熙十七年閏三月初三日

題奉

旨兵部議奏欽此查千總任鳳翔該提督保舉且寧遠

堡設在邊外應如該將軍所題准補守備可也奉

旨依議

靖逆侯靖逆將軍少傅兼太子太師管甘肅提督事務
臣張勇謹

題為衝邊亟需能員循例就近

請補以衛疆圉事竊照甘肅安遠營叅將霍營患病身

故除另疏題

報外所遺員缺應候部推但安遠設在衝邊逼近可可

口南臨海彝北連套彝兼以土番環居其中控制殊難
非得深知地利膽智兼優人地相宜之員不克勝任斯
職查臣標後營遊擊劉虎才堪御衆智能悉邊且連年
征勦果敢先登有軍功紀錄二次堪以補用安遠叅將其
所遺後營遊擊員缺選得本營中軍守備孫應宰沈
毅有謀兵機諳熟有軍功紀錄一次堪以補用其後營
中軍守備員缺查得功加署叅將王友資謀畧夙裕戰
功屢著有軍功紀錄二次且奉有遇缺即用之

旨堪以補授以上三員臣緣地擇人因才補缺相應循
例出具印結

請補除將各弁履歷備造清冊并印結送部外臣謹會
同督臣哈占合詞具

題伏乞

皇上睿鑒勅部議覆施行康熙十七年閏三月十五日

題奉

旨兵部議奏欽此查遊擊劉虎等既經該將軍侯保題

且安遠地方又設在衝邊非腹裏可比應如所題奉
旨依議

靖逆侯靖逆將軍少傅兼太子太師管甘肅提督事務
臣張勇謹

題為極邊需員最亟特舉才能補授以重邊防事竊照
嘉峪關遊擊劉大明因病辭職業經另疏題

報外所遺員缺應候部推但嘉峪關為極邊要地非得
才畧素優堪資守禦者恐難稱職臣看得標下隨征功

加副將武自成狀貌魁梧膽智充裕兼以攻克臨洮首
先登城恢復蘭鞏前驅効命現有軍功紀錄一次并奉
旨遇缺補用授以嘉峪關遊擊洵為人地相宜銜缺相
當用資固圉而邊防大有攸賴美臣循邊地用人之例
出具保結

題

請除保結履歷送部外謹會同撫臣華善合詞具

題伏乞

皇上睿鑒勅部議覆施行康熙十七年六月二十二日
題奉

旨兵部議奏欽此查武自成原係甘肅提標前營千總功加署副將有軍功紀錄一次留標効用遇缺補授今該將軍既稱嘉峪關設在極邊將武自成保題前來應如所題奉

旨依議

靖逆侯靖逆將軍少傅兼太子太師管甘肅提督事務

臣張勇謹

題為嚴疆亟需才能將備請乞就近

題補以固邊疆事康熙十七年七月二十六日准涼州
提臣孫思克咨稱邊疆與内地不同而城守與各營復
別查甘州叅將一缺內則捍衛城池戢和兵民外則把
守關隘防禦番彝并一切脩理器械製造火藥巡邏偵
探捕緝奸宄稽查斥堠皆其所司責任綦重况兼轄梨
園暖泉與夫東古城磁窑口太平堡等處時防海彝出

沒較之別處邊營尤為衝險必得明敏練達熟知地勢
夙諳番彝情形者方克勝任今原任叅將王履吉既以
老病告辭所遺員缺刻難乏人恐部推一時未到即或
到任而邊方形勢未必周知爾時始議

題請更換則一往一來不無耽延時日且目今用兵之
際尤宜擇人以資勦禦者也今查有功加署副將現任
高古城遊擊牛一麟老成練達材技優長生長邊方深
知地利堪以肩茲重任又連年隨征河東屢立戰功以

軍功八等蒙

恩加陞署副將職銜尚餘軍功紀錄二次合無即以署副將職銜就近

請補甘州城守營參將則銜缺相當人地相宜用資防守誠可以收其後効也至牛一麟倘荷

准補其所遺員缺查得功加署副將管標下後營中軍守備事余啟膽智兼優堪資戰守且歷俸年深屢立戰功亦以軍功八等加署副將職銜合無請補高古城遊

擊員缺則前功足紀後効方新行見戮力疆場未有不
感激思奮者也至所遺守備員缺看得功加署副將管
標下後營千總事李士達英年銳志膂力方剛隨征用
命屢著勞績見有軍功九等加陞署副將職銜合無請
補後營守備員缺以上三員皆隨標年久四處征勦爭
先撼陣奮不顧身其才技智謀悉堪任用相應循例出
具保結咨請查照具題

請補施行等因到臣准此該臣看得甘州城守一缺地

處衝邊必須才力兼優之員方堪理繁治劇有裨邊務
今提臣以功加署副將高古城遊擊牛一麟生長邊陲
熟知形勢又河東征勦屢建戰功堪以補用其高古城
遊擊員缺以提標署副將管後營守備事余啟技畧超
羣戰守堪資曾屢立戰功歷俸亦久堪以補用其後營
守備員缺以署副將管後營千總事李士達年力方剛
戰陣敢先堪以補用查以上三弁俱為人地相宜屢著
戰功之員既經提臣循例出具印結保舉前來臣謹會

同提臣孫思克合詞具

題伏乞

皇上睿鑒勅部議覆施行康熙十七年七月二十八日

題奉

旨兵部議奏欽此查遊擊牛一麟守備余啟千總李士達既經該提督以熟知邊情技畧超羣保舉且甘州等處俱係衝邊地方應如該將軍所題可也奉

旨依議

靖逆侯靖逆將軍少傅兼太子太師管甘肅提督事務

臣張勇謹

題為循例保舉補授將弁以重巖疆事康熙十七年十一月初四日准提臣趙良棟咨開案照中衛營副將賴塔病故緣由業已咨報候

題在案查中衛乃寧夏之極邊距鎮三百餘里西界涼莊南臨蘭鞏內則香山各水頭山野民愚素稱難治外則營盤長流五塊一帶為河西蒙古出沒之地該營副

將必須才智優長恩信孚人者方克勝任今提標中軍
叅將趙彝鼎任事勤敏堪寄一方雖中軍為五營八路
首領兵馬錢糧總司應難輕調緣係本提督之姪不便
久任合無仍以原銜調補中衛實為人缺相宜其所遺
中軍叅將員缺查後營遊擊胡攀桂英年壯志遇事敢
為不獨奮力著有戰功抑且實心虔共厥職合無仍以
遊擊職銜調補中軍兼管中營叅將事至中營守備師
帝賓智識過人膽畧軼衆前隨本提督單騎抵寧撫安

地方收拾人心不負委任動合機宜勞不可泯合無量
加職銜陞補後營遊擊更隨征還職守備高允焯勤勞
日久立有戰功且係部覆遇缺補用之員合無請補中
營守備以上四員本提督原從巖疆要地需人起見遵
例具結保請伏乞本爵俯賜具

題等因到臣准此該臣看得寧夏中衛副將賴塔因病
身故除另疏題

報外所遺員缺查中衛設在極邊為寧夏西陲重地必

得才能素著之員始有裨于地方今准提臣以提標中營叅將趙彝鼎調補中衛副將即以後營遊擊胡攀桂擬補提標中營叅將復以中營守備師帝賓擬補後營遊擊以隨征遇缺補用守備高允焯擬補中營守備臣查各弁才悉堪用既經提臣循例具結保舉前來除將各結送部外臣謹會同撫臣鄂善合詞具

題伏乞

皇上睿鑒勅部議覆施行康熙十七年十一月十一日

題奉

旨兵部議奏欽此查叅將趙彝鼎遊擊胡攀桂俱歷俸
未經年滿師帝賚係署守備管守備事如補遊擊似屬
過優但中衛寧夏係邊地且該提督既將趙彝鼎等保
舉該將軍具題應照例補授可也奉

旨依議

靖逆侯靖逆將軍少傅兼太子太師管甘肅提督事務
臣張勇謹

題為邊堡重地特舉能員以固疆圉事竊照西寧保安
堡守備王拱斗因患病辭職業經另疏具

題外所遺員缺關係衝邊難以久懸查保安堡設在境
外孤立之地番彝環居最難控馭非才能素著熟諳邊
情之員難以任用選得阿囉營千總張得祿才能練達
久任邊營屢從征戰著有勞績且歷俸九年有餘以之
補用保安堡守備洵為人地相宜可資實用者也緣係
選補要地能員除循例出具保結送部外臣謹會同撫

臣鄂善合詞具

題伏乞

皇上睿鑒勅部議覆施行康熙十七年十一月十一日
題奉

旨兵部議奏欽此查該將軍侯張勇既稱千總張得祿
才能歷練保題補授保安堡守備應如所題可也奉

旨依議

靖逆侯靖逆將軍少傅兼太子太師管甘肅提督事務

臣張勇謹

題為彝情叵測邊地兵單請暫設總鎮以重控制事竊照套彝噶爾旦與海上蒙古雖有結親之好然世為仇敵未必始終不渝萬一有西海之爭兩彝自相攻擊則我內地恐難警息無聞所有隄防堵禦之策應於未雨綢繆查甘肅兵力單薄兼以連歲四出征勦兵疲馬敝若不預為籌畫以致倉皇失措貽悞封疆誠靡細也况今逆氛未靖臣現統兵前赴鞏秦鞭長莫及顧此失彼

更不得不鰥鶩是慮者耳合無將肅州協營改為城守
營再設總兵官一員添兵三千照馬三步七之例設立
三營蓋肅州窮邊極險為二尋往來道路有此一鎮官
兵以資控禦則進戰退守均有攸賴也倘慮需餉浩繁
或就興漢二鎮內酌調一鎮移駐肅州俟地方底定臣
兵回汎之後再議裁撤仍舊分布庶彈壓有資而邊防
得以鞏固矣應否可行臣未敢擅便為此理合題

請伏乞

皇上睿鑒勅部議覆施行康熙十七年十一月二十一
日題奉

旨兵部議奏欽此查秦省增添官兵甚多今當需餉浩
繁之際不便再添官兵該將軍所請改營設鎮添兵之
處應無庸議撫遠大將軍公圖海等身在地方悉知緩
急緊要與不緊要可否暫調一鎮統兵赴肅防守聽撫
遠大將軍公圖海總督哈占將軍侯張勇公商酌行可
也奉

旨依議

靖逆侯靖逆將軍少傅兼太子太師管甘肅提督事務

臣張勇謹

題為秦省勦撫方殷重臣不便久離仰祈

睿鑒迅

勅還陝以安民心以濟軍務事案照臣准撫遠大將軍
公臣圖海咨為移知事內開本大將軍具疏懇請入

覲已蒙

俞允今騎自備馬匹赴京

陞見不日言旋所有留秦大兵業經奉

旨著建威將軍吳丹暫行統轄合咨貴將軍侯煥為查
照嚴飭各汛官兵固守地方遇有軍機重務移會建威
將軍商酌而行可也等因移咨到臣准此臣思陝西幅
員萬里古稱河山百二乃天險之地也兼以三邊衝要
營堡孤懸守禦隄防尤刻難疎忽者自變亂以來警息
頗聞烽煙未淨幸仗

皇上知人善任

特簡大學士圖海畀以西征之權託以閫外之寄而大學士臣用能仰體

皇仁勦撫兼施故一戰而平涼歸誠川逆遠遁安民禦寇綱舉目張其幄算帷籌雖古名將何以加茲且開誠布公推心置腹俾一時文武各官人民軍士靡不深相悅服洵秦地長城也茲因久離

天顏疏請

陛下見旋奉

俞旨仰見

皇上憫念勞臣

眷顧有加至意但陝西遭羣寇蹂躪之後民不堪命加以漢興負固現在酌議進兵所望重臣撫綏控制不啻援溺救焚懇乞

皇上俯鑒三秦重地勦撫方殷速

勅大將軍公圖海回陝庶人心鎮定金息潛消疆圉軍

民均有攸賴矣為此具本臣謹具題

知康熙十八年正月二十七日題奉

旨已有旨了該部知道

靖逆侯靖逆將軍少傅兼太子太師管甘肅提督事務

臣張勇謹

題為岷州地隣賊境協將缺難久懸特舉能員以奠封
疆事康熙十八年二月十六日准甘寧撫臣鄂善咨開
康熙十八年二月十四日准貴爵咨開洮岷副將呂天

玉病故委令本部院標下中軍遊擊岳鎮邦署理緣由
到部院准此查得洮岷現隣賊地控制必須得人貴爵
選擇岳鎮邦署理誠為允當查岳鎮邦在鞏昌及靜寧
樂門等處勦賊屢立功績

題報在案嗣准部覆議叙功次應加三等仍紀錄一次
合無以本官就近

題補洮岷副將可為人地相宜所遺員缺查標下右營
遊擊劉廷棟才技優長屢著戰功堪以調補所遺右營

遊擊員缺查標下左營守備趙魁英殺賊有功業准議
叙一等堪以補用其所遺員缺查原任雲貴督標中營
守備劉虎才猷懋著堪以補用本部院循例出具印結
并各弁履歷一併咨送煩請查照會

題施行等因到臣該臣看得洮岷副將呂天玉病故員
缺查岷州切近階逆日事堵勦又洮州設居番族時殷
防範必須謀畧兼優聞望素著者庶能威懾賊氛彈壓
番族於以靖外安內也查撫標左營中軍遊擊岳鎮邦

沈謀有斷果敢爭先屢經戰陣奏捷居多以之補用洮
岷副將實為人地相宜所遺撫標左營中軍遊擊員缺
查右營遊擊劉廷棟才技兼優隨軍征勦著立戰功堪
以調補所遺右營遊擊員缺查撫標左營中軍守備趙
魁英才力轉衆勤賊著勞堪以補用所遺左營守備員
缺查原任雲貴督標中營守備劉虎屢隨征勦勤勞日
久堪以補用以上各弁原係臣揀拔

題用悉知其才技優長今銜缺雖有未符于人地悉為

相宜既經撫臣具結保舉前來臣亦出具印結併將各弁履歷送部外謹會同撫臣鄂善鎮臣朱衣客合詞具題伏乞

皇上睿覽勅部議覆施行康熙十八年二月十九日題奉

旨兵部議奏欽此查該將軍侯既稱洮岷地方切近階逆設居番族且岳鎮邦等俱係才力優長保題等語均應如所題補授奉

欽定四庫全書

張襄壯奏疏

四庫

旨依議

靖逆侯靖逆將軍少傅兼太子太師管甘肅提督事務
臣張勇謹

題為巖疆急需能員擬補將備以資邊防事康熙十八年四月初四日准西寧鎮臣朱衣客咨開照得河州地處極邊逼隣西彝撫綏彈壓實惟副將是賴今該營副將楊三元已經陞任所遺員缺急需能員查鎮海叅將劉忠久歷邊疆才識敏練堪以陞補其鎮海叅將員缺

密邇海彝最屬險要查本鎮標下中軍遊擊汪溥狀貌魁梧謀畧超邁以補鎮海叅將殊稱人地相宜查前營遊擊米之順馭兵有術武藝超羣以之調補中軍遊擊員缺用資經理錢糧可無貽悞更查西寧城守都司楚名俊年力精壯才名出衆堪以陞補前營遊擊員缺至於右營守備胡禎久歷營伍弓馬熟嫻堪以陞補西寧城守都司員缺至於中營千總官斌壯年果敢騎射優長堪以陞補右營守備員缺以上各官俱人地相宜本

鎮照例出具保結并履歷咨會煩請查照具

題等因又准督臣哈占咨為推陞副將事准兵部咨內開江南江北徐州營副將惠占奏題補員缺今掣著楊三元希轉飭副將楊三元速赴新任仍移甘撫知照施行等因各到臣除飭令副將楊三元速赴新任外該臣看得河州副將楊三元陞任員缺自應靜候部推但河州逼近西彝番族環居非才畧敏練久悉邊情之員不克勝任今查鎮海叅將劉忠歷任衝邊熟知彝情才幹

明敏堪以補用河州副將其所遺鎮海叅將員缺設居
市口最屬衝繁查西寧鎮標中軍遊擊汪溥饒有謀畧
才力兼優堪以補用所遺鎮標中軍遊擊員缺查前營
遊擊米之順才技過人士卒畏服堪以調補所遺前營
遊擊員缺查西寧城守都司僉書楚名俊智力俱優遇
事勤敏堪以補用所遺城守都司員缺查鎮標右營守
備胡禎久經戰陣技藝純熟堪以補用所遺右營中軍
守備員缺查鎮標中營千總官斌年力正富技藝復長

堪以補用以上各弁銜缺雖少有未符人地俱屬相宜既經鎮臣保舉前來臣謹具印結并各履歷送部外謹會同甘撫臣鄂善鎮臣朱衣客合詞保

題伏乞

皇上睿鑒勅部議覆施行康熙十八年四月初九日題奉

旨兵部議奏該臣等議得該將軍侯既稱河州番族環居且劉忠等俱係才力兼優等語均應如所題補授奉

旨依議

靖逆侯靖逆將軍少傅兼太子太師管甘肅提督事務
臣張勇謹

題為邊地亟需能員謹循例保舉以固巖疆事康熙十
八年六月初二日准督臣哈占咨為推陞副將事內開
准兵部咨開浙江台州副將秦弘猷陞任員缺今掣著
黃鉉查黃鉉河南人由外委以遊擊管陝西甘肅永固
城副將事有軍功紀錄二次歷俸年滿今應陞以署都

督僉事管浙江台州副將事等因奉

旨依擬用欽此併移劄付到部院准此移咨到臣竊照甘州永固城一汎處大草灘之中逼近海彝乃甘肅極邊要地也今該營副將黃鉉已陞台州副將所遺員缺必須諳熟邊情才畧素優者始可以資彈壓臣選得鎮番叅將陳應啟才猷軼衆洞識彝情歷任邊營熟知地利堪補永固城副將所遺鎮番叅將員缺選得臣標左營遊擊史孔筆生長邊地才技兼優戰功屢著有軍功

紀錄六次堪補鎮番叅將所遺左營遊擊員缺選得臣
標中營中軍守備李弘鑒沈毅有謀騎射超軼有軍功
紀錄五次堪補左營遊擊所遺中營守備員缺選得臣
標中營千總韓成年力精壯戰陣先登見有軍功紀錄
六次堪補中營守備以上各弁俱人地相宜以之推補
各缺實于邊防有賴者也相應循例具結保舉除將印
結履歷送部外臣謹會同撫臣鄂善提臣孫思克合詞
具

題伏乞

皇上睿鑒勅部議覆施行康熙十八年六月初四日題奉

旨兵部議奏該臣等議得該將軍侯既稱永固城地方
係海彝切近極邊重地將陳應啟等保題均應如所題
補授奉

旨依議

靖逆侯靖逆將軍少傅兼太子太師管甘肅提督事務

臣張勇謹

題為咨請就近

題補將備以勵邊才以收實效事康熙十八年九月十八日准涼州提臣孫思克咨稱安遠叅將劉虎以眼疾告辭業經查明真確咨會在案但安遠一營處萬山之中正當大通河腦之處逼近海彝巢穴兼以四面俱係番族挿帳非得熟識邊情膽畧出衆技藝超羣之員難司厥任查得山丹營遊擊邊永昌生長邊地久歷戎行

彝情固所熟識險隘又復周知遇敵果敢當先行兵紀
律素著且連年隨征河東立有軍功合無即以遊擊邊
永昌擢補安遠叅將其銜缺既已相當人地又復相宜
最于衝邊有裨者也至山丹遊擊員缺查得本標中營
中軍守備王三元英年銳志技射熟嫻屢隨征勦勞績
最著堪以拔補其中營守備員缺看得本標前營千總
宋秀明敏練達才智優長鋒鏑不避奮力爭先堪以拔
補此三弁者隨本提督出征進勦久相指臂其膽畧才

技知之最稔倘得就近擢補則三弁感

恩思奮益殫壯猷而邊疆可收得人之效矣謹循例出

具保結合咨查照速賜會

題等因到臣准此該臣看得安遠叅將劉虎因眼病失明難以供職業經具

題辭任在案查安遠為衝邊要地番族環居必須精明才幹之員方能控禦既經提臣以山丹遊擊邊永昌生長邊地熟識彝情遇敵敢先兵紀素著見有軍功紀

錄二次擬補安遠叅將其山丹遊擊員缺以中營中軍
守備王三元技射熟嫻勞績最著見有軍功紀錄三次
堪以補用其中軍守備員缺以前營千總宋秀明敏練
達才智優長見有軍功紀錄三次堪以補用等因循例
保舉前來除將保結并各弁履歷送部外謹會同撫臣
巴錫提臣孫思克合詞具

題伏乞

皇上睿鑒勅部議覆施行康熙十八年九月十九日題

奉

旨兵部議奏欽此議得將軍侯既稱安遠營設在衝邊
番族環居將遊擊邊永昌等保題前來應如該將軍侯
所題補授奉

旨依議



張襄壯奏疏卷五